

四庫全書

集部

欽定四庫全書

集部
道鄉集卷五
六

詳校官庶吉士臣吳烜

侍讀臣孫球覆勘

總校官中書臣朱銓

校對官典簿臣劉景岳

謄錄監生臣劉人鶴

欽定四庫全書

道鄉集卷五

宋 鄒浩 撰

古詩

將往昭州示柄

與汝暫相別南作昭州行昭州距零陵坦坦十日程音
信易來徃勿動異鄉情但自勤讀書思索厥義精聖賢
如日月為汝出光明脩身識根本力踐以其誠發為文
字間筆墨自縱橫零陵豪傑士張鄧尤高名汝其師事

之北面聽指令分陰古所惜况乃汝後生定省汝母外
謹勿他事縈皇恩極天地我罪終從輕還家知有時欣
見汝向成用為祖母壽慰叔及弟兄携汝返鄉國重增
門戶榮

飲桂州酒示柄

好酒如好人雖久略不變炎涼互推移氣味愈可見豈
若茅柴漿多為衆所賤舉杯吾得師足以警閔燕

題義明定慧庵

結草依山名定慧於此真心第一義
鑪香深炷席簾垂
老僧不見庵外事

答曾敷文有書見寄

有云客寓天地間本
南北異耳作此答之

客寓天地間本無南北異此語安從生却成相鈍置

戲作

作自我作止自我止莫被傍人推倒扶起

詠路

赤路如龍蛇不知幾千丈出沒山水間一下復一上伊

予獨何為與之同俯仰

一切諸佛子

我心如虛空無物可倫比
湖南與嶺南誰行與誰止
寶山得樓居屹枕樂川水
森森青琅玕卻暑幾千里
團蒲疊雙雙爐烟凝然起
圓覺首楞嚴遮眼聊爾耳
幽禽忽來鳴一切諸佛子

榴花

閣東閣西安石榴兩株相映花
枝稠山高江濶萬木葉

獨此爛熳開不休有如牙門集纓紱碧油幢外紅光浮
又如青天駐羲御火龍鱗鬣驚人眸朝朝莫莫看愈好
直若有意寬離憂無窮歸念姑且置欄邊取醉商聲謳

仙宮嶺

曉雲生嶺端遮日成清陰炎氛遽辟易興逸安能禁仙
宮風塵表高高百千尋石路上曲折健足猶難任綽約
兩仙子雙鬟坐沉吟巫覡意何許門窓藤蔓深樵叟向
我言自古傳至今去州五十里有峒鬱森森陶家李家

女年各勝巾衿恍惚若逢遇相與登崎嶇一朝作蟬脫
英魂不墜沉鄉人共祠之髣髴來顧歆水旱禱輒應民
吏同所欽此宮乃行宮春秋薦誠謔言已叟仙去四望
祛煩襟滎山直南聳龍嶽山朝壬越王連佛子密山秀
孤岑回環萬峯巒挿雲皆玉簪滔滔兩川流會合通梧
潯漁舟糝木葉城郭幾突黔虛徐韻長松飛鳴集珍禽
須臾烟靄青遐邇浮稜稜變化紛見門飲酒時一斟我
罪貸五鼎我軀重千金雖居瘴癘鄉肯使瘴癘侵囊衣

完舊裾匣劍存初鑱氣聽謝耳力誰到無絃琴子期久
冥漠天地為知音中和王度新祈招詠惜惜賜環諒匪
朝聊以寫我心

送子發還零陵

我自罪大當投荒君胡為乎亦遑遑馬蹄舟楫困川陸
省定違離萱草堂由來孤操絕流俗屹與巨鎮遙相望
洞庭以南渺無際氣象突兀收湖湘平時事事不入眼
惟恐有媿如毫芒色難直到古人處以其緒餘均四旁

餘波邂逅亦及我使我方寸失感傷我親白髮照閭里
我身跼踖瘴癘鄉兩兒隨母仍舊寄骨肉星散知幾方
乾坤子初無厚薄恩為雨露威雪霜二柄交持不偏用
萬彙生成如審量我雖棄擲五嶺外亦必有日蒙恩光
故人亭邊是歸路尚得握手輸中腸將分無可為君語
獨有高義無時忘

有感

雲回雨歇天欲晴鶉鳩喚婦皆和聲山南山北樹陰裡

懽然相趨爭飛鳴伊予流竄止平樂妻孥尚寄瀟湘城
五嶺橫空喚不聞不如鶉鳩猶有情

聞彥和過桂州

人臣難有已况復顧其家忘家以徇國致主為勛華割
愛非不仁成功詎能加御史殿中傑指摘生疵瑕昔如
鵠矯雲今如兔罹置省符到房陵驅逐殊喧譁即日出
門去形影自天涯羈皇携衆雛驚散隨風沙渺漭失處
所何由書報嘉君心固已定聞者空傷嗟

又

削迹投炎荒有吏督其後一州一易之稍緩輒訾詬所
歷多官僚豈無親且舊前車覆未遥不敢略回脰誰謂
桂嶺僧於君獨勤厚沐浴君髮膚澣濯君領袖使君霜
柏姿凜凜出塵霧真風絕顧瞻高義激頽仆乃知世外
情非復世間構嗚呼君何憂時命不終繆

自警

看書勿苦多多看目力眊作文勿苦多多作心力耗初

雖莫覺悟久乃成悔懊維心神所居惟目神所造開闔
出入間神傷氣亦暴所以古真人丁寧有深告平時當
勤行况復處炎燠况復病初愈力始勝巾帽老母在鄉
邦倚門望佳報尤宜決擇精全神以自好收目以內視
冥心以存奧氣舒形康強外務一除掃生理保安完天
恩垂覆幬歸看老萊衣歡欣長舞蹈

感歎

一犬捕執將祭神羣犬隨之號極聲惡傷其類乃如此雖

至苟賤亦有情人於天地最為貴詩書禮樂開聰明
推恩尚欲極萬物而况等列皆簪纓奈何心忍所不忍
相殘相賊爭功名因知微畜反可尚使我感歎無由平

送李師聃祖道長官赴衡州耒陽令

視國如視家愛民如愛子秉心金石堅古人概如此今
人亦古人但患物轉徙遑遑聲利間自不明本已安能
使元元一以父母比問其所居位廣分國百里問其所
食祿盡出民骨髓奈何莫之思顛倒以為是祖道於今

古問學妙窮理內重外物輕識者久歎美宰制得耒陽
何啻牛刀委導達聖主恩千仞決谿水雨暘隨指呼絲
穀旣鄰鄙明神實聽之日夜介福祉君雖不求通軒冕
自難已工部有英靈吾知為君喜

示徐道人

道人千里來觸熱廢寢膳問其何所為但云求識面南
方諸公門二年走略徧亦有苦苦留諸事頗安便念未
見侍郎跋涉遂忘倦皇帝與天同深恩滿州縣瘴鄉寧

久留行復侍金殿賣藥至京師禮數隔貴賤姓名且難
通况復冀垂盼汝言豈吾知答之一笑倩

諭徐道人少唱喏

孔明拜林下德公初不止道人必見喏我今勿復爾道
人非孔明喏拜不相似維我德公心寥寥無彼此

詠菊

菊菊叢叢簇簇種階除脫巖谷玉幹碧鮮金英黃郁爭
妍無小桃結好有修竹滿泛醇酒千杯高簪道巾一幅

庭前子美休作詩籬外淵明自留目

詠竹

竹竹瀕江遠屋聲泠泠影矗矗霜雪難侵塵埃莫瀆梢
雲齊老松帶日映寒菊籜置頂上高冠葉成樽中美祿
行看威鳳飽相從不但子猷情最熟

有所嘆

親者如路人故者如世讐路人與世讐反與親故侔無
日不同處無事不同謀自謂腹心托長久逾千秋不知

禍有孕有識所深憂一旦乘間作四顧誰依投徃徃捨
之去掉臂不回頭却思故與親大寒索衣裘聰明天資
高反已亦易求及此早覺悟厥疾猶可瘳

莫釣磯

飯罷何所之曳履江之湄粼潏白石間得石殊瓌竒瑩
然如紫玉屹立平不欹振衣坐其上聊以垂綸絲吾釣
既不曲吾餌亦不施持釣非有釣與魚均莫為魚樂吾
已得吾意魚豈知投竿歸去來晨昏以為期

下鷗臺

此心久已灰入鳥無驚猜輕鷗翔集處邀我相徘徊方
圓十丈許疑是天所開鏘金兩灘瀨簪玉千崔嵬耳目
肝肺中何由着纖埃鷗雖不解飲屢舞勸我杯清狂與
酒狂似此知幾回我歸有日矣鷗飛安在哉

讀頤卦

靈龜不語亦不食深之又深乃其息清冷淵中能事畢
天長地久無終極朶頤自朶非自得何暇外觀惟汝即

吾言易行休更惑抱一故為天下式

九日對菊

不雨江亦乾草木翳塵土重陽到眼前菊葉猶未吐
隣家一株來高才尺四五種之小庭中亦自足風矩摘葉
以當花茱萸可為伍泛我流霞杯喜色動眉宇頽然道
遙遊妙處有誰覩淵明何人斯東籬傲今古

道鄉歌

要識道鄉去處只在微塵裡許不立四至封疆不問二

儀寒暑日月常放光明鳥獸率同歌舞其俗無舉無非
其民無喜無怒別是一種乾坤全異九州風土師曠傾
耳莫聞離婁拭目莫覩誰知有箇冥蒙踏着從來門戶
入也不動脚跟居也不記年所行住坐卧虛徐色聲香
味愚魯偶然成矩成規未嘗為鼠為虎任他卜度縱橫
迥脫機關取與人間天上無明可謂自今自古

夢臣惠潘谷墨

老潘飛躡烟霞去墨寶流傳能幾許尚方猶以比庭珪

况復人間故人處夫君好事追前賢巾襲深藏二十年
雨暘燥濕莫知數畢竟挺然金石堅一朝酒發南箕舌
信在言前可中輟有如印弄掌握間稜角雖刳終一決
著書天祿垂無期雲將掉頭吾弗知但欣厚意厚若此
來仙閣上信雙眉我有歛州韞玉石琢成高秋遠天碧
平時長自水流珠未省呼童助涓滴我有常州飽霜毫
千錢一管價不高真行隸草字百萬勁鋒凜凜方道豪
絳人陳元乃其伍相得惟甚誰能禦心灰緣此亦復然

和我精神動寰宇便滌硯便操筆便啓軒窓磨此墨敲
冰佳紙適及門羅列千張耀晴日也吟詩也作文也把
黃庭摸右軍并包萬類入方寸倏忽變化生乾坤君不
見老子絕學故能學君不見孔子捐書故能書因君起
我書且學我書且學孔老俱孔老俱竟何如寫我長句
酬勤渠

又

潘谷賣墨時呂翁嘗過之指授長生訣舉世那能窺但

稱衆墨中谷墨最珍竒一旦內藥成解去逃喧卑忽忽
期月後來與丹元期夜飲曉分手丹元初不知仍留墨
數片屬元付其兒有兒旋其門頂白元驚疑細詰所以
然始知谷如斯谷仙今幾年谷墨今在茲靜言人間世
舟壑常容移朱顏兀槁木綠髮垂素絲借令富貴極畢
竟將奚為谷乎真可人得墨吾得師

夢臣再以墨來

孫郎文史外所好墨而已龜玉藏櫝中消辰乃開視未

嘗輕示人每戒卞和耻謂予心事同分惠真可喜磨去
五之一餘者恰盈咫印弄稜角利前言戲之耳蒼頭忽
踵門喘汗殊不止恍疑皂囊藥無因至於此亟取啓緘
封入眼勝雙鯉其長應天數其光動晴晷當暑尚挾纒
豈但什襲比且云此不刊品色尤更美始知雅意來要
以補前毀想初聞語時廢書頻拊髀兵法善致人所致
必如指一朝下兩城曾不費一矢坐令鼎足心成轍亂
旗靡堂堂莫我過勢若建瓴水墨果多乎哉一一孤

壘齊城七十二受降從此始

別昭平

江山本無情別去亦何語
向來爽氣中食息三月許
來非吾所求去非吾所禦
回首謝江山吾今若輕舉

留別張雲立立之

立之昭士也

來遷夢破知何處今君歸去仙宮路
江頭舟楫嶺頭雲
曾許乘風邀月住
翛然三載與君同
信我此心惟白鷺
白鷺忘情亦有情
君更情多無量數
天繪亭前不忍分

遠送我來欣進步霜凋萬木見孤松顏色青青獨如故
湘南湘北舊光陰從此回頭但烟霧得志軒前藕未花
梅率小桃先已露與君同醉復同醒千頃池塘渺新靈
好隨魚躍趁風雷飛上青天休反顧

桂州紫極觀主求亭名名曰轉斗而示此句

轉降適斗藏初九上清密語誰知有七星峯頂紫霞前
占得輝光長不朽

信中以詩來因次其韻送之

道言誰復書諸紳瀟湘江上逢斯人向來濱死入魑魅
胸腹洞然無甲鱗炎氛吹風作旗靡玉樓倒影明蒿里
孤心還逐冷雲飛歷歷長亭不知幾聖王開了覩天庭
妙脫筌蹄合喙鳴箇中無可無不可智者亦迷何處名
渾沌兼忘儵與忽有口鼻如欣莫咄北山之北草堂深
怨鶴驚猿它自物

送李方幾仲司戶

我遷漢陽居君為建陽椽江山幾千里何當重會面身

世波上萍歲月弦上箭自古以嘆嗟不古乃獨見為仁
豈由人引道道該徧萬生無終窮同我一方便壑源春
焙香黃鸝靜中轉簡書有光陰歸坐亦可燕此事入高
明了了為君見舟車暫西東勿受離情轉

題蔣彥回緋桃軒

何仙饑食王母桃王母喚去瑤臺高懷中核乃長生種
付與東君誰適遭蔣侯本是神仙族揚州騎鶴飛遊遨
回也不愚愚故道不肯釣海連六螯變鄧家田作藍田

產玉成芝天所褒，柳將眼覩竟何覩。
花着心覓空自勞，東風莫逆花柳外。
洞然啓盡高鏑牢，鋪張雲霞駐遲日。
暖紅牽夢春陶陶，恍疑何仙只春似。
衣繡還鄉導旗旄，蒲萄浪兀弄明月。
寧比倒着宮錦袍，從今結就千年實。
食之工力逾圭刀，聞說揚州鶴知得。
鼓翼已先鳴九臯。

題成立道飛香閣

與其姪逸少隱會于浯溪求易閣名以其翬飛紅蓮中

名之曰飛香閣而作是詩

碧池千畝紅蓮花，勅書樓下醇儒家。
躋民仁壽逢主聖。

欣與萬邦無歎嗟六經變化天地濶何處不可為生涯
只今耆域在庭戶信手掇取皆靈芽氣運回環助調燮
各正性命逾塵沙是渠病愈我亦愈紅蓮影裡薰風斜
陰功乘香飛北極上帝首肯羣仙誇贈之丹桂一千尺
攀條直上凌蒼霞

少隱惠所畫瀟湘雪景

永州城北十五里二水初同為一水天花開玉滿前飛
人在故人亭子裡

又

前年深冬一丈雪巖擁朝陽渡黃葉鷓鴣插頸夢圓時
天作高山付雙曉

又

將謂雪消無覓處元來只在毫端住為余展出凍雲天
一片瀟湘宛如故

戲浯溪長老伯新

永州懷素精草書毫端萬象紛卷舒渾身是眼看不破

一筆至今藏物初悟溪得之不自用却要他人書作圖
驀然打箇筋斗去覓紙覓絹一物無急將床上被來折
手忙脚亂縱橫鋪五雲和尚巧言語掃盡六幅裁須更
疊了又開開又疊喜歡勝獲衣內珠二三子笑幾絕倒
左右僮僕咸驚呼寧比寒酸杜陵老海圖拆應家人須
脫巾漉酒解龜當表裡空曠真丈夫吾行天下何啻半
常恨眼前無此徒那知興發乃方外與彼嗜好同根株
小中現大大可觀跳出規矩渠非愚他時風雪夜參半

灰爐水冷燈影孤坐披破絮似魚網數挽不揜皴肌膚
只應侍者隔壁私自語我師為誰說法聲嗚嗚

觀華光長老仲仁墨梅

我從梅花海裡來驚此兩枝堂上開不由天降非地出
道人作麼生栽培無縫塔子通一線放光照醒陳根荻
玉蟾銀漢雨初霽半啓瓊室通瑤臺香雲漠漠護顏色
世眼欲覩誠難哉不如取酒共春醉一盃一盃復一盃
次韻和范信中同遊花藥有作

花藥山去來難遇此天日深衣書眼青摩衲禪眼碧鴈
峯相與高可以同我適浮雲當面開千里見叢華况紫
蓋祝融插天日未夕正爾無能名僧來乞題石

湘陰鄧氏翠微洞

洞有卧雲堂聽
松軒快目亭

卧雲雲無心聽松有韻快哉耳目中吾今亦同分

送成老赴西安

先生出逢堯舜時自當勲業追臯夔胸中廊廟乃州縣
雪霜刺骨西安馳旁觀往往屢興歎色初不變心希夷

但云將聖世所大棄田委吏皆嘗為道通為一無不可
等君事耳何高卑高齋高居萬物表清獻清風天下師
此心妙與此公契莫或遑處今其誰民歌仁恩到天耳
天須默薦君王知坐令四海歸一握陰陽變化隨設施
行即驗矣姑且置聊引花前金屈卮

偶書

朝讀一卷經暮讀一卷書一卷復一卷三藏與五車儒
釋本不異昧者自親踈昧者不足道明者當何如

送陳公晦

寂不聞鳳鳴雙耳聾已久聿來丹山子一旦驚戶牖舊
聽歛我還喜氣薄牛斗簫韶方九成飛勿衆禽後

吳公蔚將還滁陽出所集述德堂詩作此送之
述德高堂在何許述德高人欣可觀彭州夢破知幾人
遺愛遠追曾大父至今民數舊邦君每及吳公歌且舞
述而行之德莫窮定可周流浹天宇誰令千里便歸休
炯炯此心元自古四百六十五甲子貌若巖松傲風雨

胸中何啻法界寬普集塵沙諸佛祖一如一切悉皆如
廻脫拘攣不踰矩從橫肉眼眼詎能窺但見鼻間常栩栩
只應高與老人星長現昇平瑞明主

詠張公奠廬墓有芝三本

錫山居士張公奠廬墓側有芝三本生焉

繪以為圖
見者咨歎

此芝初無根生自孝誠裡孝哉本於誠非緣利心起無
芝非所作有芝非所喜不期芝有無秀出乃如此養志
勤色難送終極哀毀既葬不忍歸結廬獨留止孺慕秋

復春淚接九泉水比隣或未知天已知之矣因芝示邦人邦人爭贊美會逢當路賢薦此八行始

書公孫卷末

公孫三捷袖詩過予門乃一時公卿大夫士推美其前人所以孝於

其親者而韓范二公先焉故書

韓范天下賢褒貶不妄出舌端有春秋所與惟其實一舉十五喪富貴所難必公孫賤且貧茲事乃能畢心追古人高迹付今人述二老首形容昭勸無終日伊予特後聞歎恨頗自失東望天山平風松正蕭瑟

代書寄清老

從來遊戲常三昧
出語縱橫無忌諱
老聃全與釋迦同
人畏猶云亦當畏

題雙芝軒

難弟難兄強氏子
太學聲名聳多士
同時流輩久公卿
猶傍短檠業文史
今年鑒拔貢辟廡
伯仲皆升從此起
集英春曉拱天臨
龍頭妙絕人間喜
鸞臺鳳閣便騰蹇
况復吾鄉有前比
向來胸中宇宙寬
包盡華夷無復委

發為勲業助堯仁肯令元凱常專美倘如不信視雙芝
端不虛生漫黃紫

道鄉集卷五

欽定四庫全書

道鄉集卷六

宋 鄒浩 撰

詩

和路主簿思雨

造物初無欠與餘，盈虛消息自洪鑪。
晴空已見雲如火，秋穫難期米似珠。
劇邑君宜形遠慮，泮宮我亦念羣枯。
若為驚起蒼龍睡，賴有新詩勝大雩。

見諭詩頗有
感故有是句

獨坐偶書

梧桐沐雨響玲瓏
簾幕陰陰颺晚風
講誦乍聞人語息
滿床書史興何窮

寄濠州陶戶曹

臺枕長淮聳半空
登臨應得古人風
水天上下碧無際
莫獲觀魚與子同

勉畢元明

男兒數偶竒不必苦嗟咨
顏子猶簞食莊生亦布衣
百年容易老萬卷卒難窺
致力宜為者騰驥自有時

謝羅朝奉惠柏栽

惠我柏雖小觀君意實深欲令儒服者同此歲寒心月
映庭雕玉風來韻響金公車已馳節不及待清陰

和錢簽判贈胡都曹

公餘來訪習家池楚楚王孫桂一枝九十春光未過半
倒壘尤喜有前期

和路主簿喜罷役法并酬范奉議見寄

因草紛然豈用情由來消息與時行奏封直指財并力

造法當期實應名可使華夷漸潤澤不煩衡石自均平
將明況是憂民者即見熙熙百室盈

酬黃秀才見寄

自期謀道豈謀身不逐輕狂戲此春讀史窮經求在我
攀龍附鳳彼何人一言逢主未如志百結成衣肯歎貧
早晚病除堪屬思新詩莫厭起予頻

偶書

底事素絲不自高傾心劇孟久遊遨元來緩急叩門處

狗義忘軀勝我曹

和郡主簿絕句九絕

管鮑當年志風霜固自如
信良緣嗜慾豈在數行書
俗論長紛若微言僅夢如
逢君揮玉麈勝讀十年書
肘後虛金印梅仙職偶如
升高元自下功業異時書
塞北亢喉地并門子所如
六花無處用卻穀自詩書
能詩唐太白善賦漢相如
元帥真文舉應先薦禰書
取友能無忤初終貴一如
陳張遺轍在試展馬遷書

咳唾成珠玉吾儕孰子如更勤潘氏學豈愧樂尚書
提履歸何處觀花笑自如期君求向上糟粕古人書
春風暗楊柳相見意何如雖愧江淹筆狂言為子書

送詩卷還參寥

盈軸新詩字字清彌天元不愧聲名茂陵消渴無醫處
賴有醞醕得細傾

和路子高微雨中至山光寺

野濶天低四望賒霏微膏雨兆休嘉
早鐘鬱鬱穿雲斷

官柳垂垂夾道斜，邂逅庭前方指柏。逡巡木末已棲鷗，
揚朱易服歸來處。荷笠收車幾萬家。

送監作院潘供備

盟府功臣奕世孫，低回筦庫尚隨羣。干戈分職名雖武，
詩酒忘懷格自文。傾蓋二年嗟往事，贏糧一日指行雲。
江梅欺雪南枝發，如綉新除定此聞。

其二

飄飄雅致孰如君，旋闕西軒置酒樽。振木豈惟聞白雪，

斷纓仍許醉黃昏
長亭風順已言別
小園春迴空自繁
惆悵潛齋不知處
何年攜手却重論

簡王正父覓酒

甕面蛆浮玉槽頭
水滴珠未能如茂世
聊與義城俱

寄周彥廉

楚水不風魚逝遠
霜天初月鴈飛高
履穿袍敝渾無暇
目斷心馳祇自勞

和劉知錄見寄并簡陽先生

行先

劉郎爽氣曉霜晴
陽子高懷寶鑑明
雖幸竹林容入會
每慚布鼓獨無聲
一杯葵藿真佳趣
五鼎牛羊謾宰生
廊廟他年調燮手
不妨潛室且和羹

和陽先生見贈

萬卷藏書肯自閒
沉涵聖道欲晞顏
片心既與人寰遠
逸駕寧容俗士攀
嗟我曳裾膠擾處
荷君置榻寂寥間
藜羹玉麈清何限
每到斜陽不忍還

求劉知錄澄泥香爐

千卷新書三疊琴青燈炯炯夜沉沉野人此外無餘好
只欠澄泥一炷深

大雨中接憲使因成小詩呈陽先生

霜風折木雨如傾歛板泥中廝役并遙想先生鼓琴罷
觀書正傍短燈檠

次韻盛長官覓酒

九萬鵬程戢怒飛驅愁却歎酒無威類官官冷非文舉
一斗何能醉十圍

次韻胡秀才遺桃花

灼灼桃源數朶紅，青禽傳到華門中。
傍人只喜窺春色，達士元來寄祖風。
謾說幾經千歲賞，會須一笑萬緣空。
沉香散處團蒲穩，花自蕃鮮體自同。

次韻俞秀老建隆道中

道人不獨是詩豪，曾把滄溟注一毛。
破曉聯鑪訪孤寂，致身如在太山高。

次韻慕公實

從來文史足三冬何事明時作退翁刺口豈能論擾擾
冥心直欲似空空半軒蒼莽雨初霽一釣清冷月正隴
好把晨昏付香火箇中真樂更無窮

次韻錢岳雪中

六出飛瓊玖雲愁正臘天寒聲生密竹爽氣徹純綿故
苑風初靜重樓月向圓何當酬此景蘸甲引金船

次韻王賢良贈陽先生

脩塗幾閱歲終窮鶴唳猿啼蕙帳空杖屨何當歸舊隱

靜看五柳颺春風

其二

囂囂所樂本非窮
曾向真乘悟色空
聞說近添方外友
清談應得晉人風

二月十五日朝拜建隆橋上偶作

單衣迎犯曉風清
斗柄回南月尚明
柳密行人看不見
輪蹄相屬但聞聲

清明日遊大明道中

春風蕩漾遍天涯縱步郊原事事嘉不許遊人同所得
竹林深處試龍茶

和通判王定國承議遊竹西

流年忽忽又殘春策杖郊原肯厭頻往古來今何足校
閒花幽草自爭新旋開酒蟻成高會共解名韉作逸民
隨處怡然真有味不須千里憶吳尊

其二

一霎狂飈破曉陰春光極目幾千尋會須勝事追蓮社

更約幽人訪竹林
渺渺平田涵白水
蕭蕭蒼檜聒清音
鄭虔才大猶遭罵
重愧持杯許脫簪

送胡適道秀才東歸

十年星散忽相逢
寂寞蕪城古類宮
一炷澄泥窺祖冢
三卮浮蟻對春叢
穿芻豔解留天驥
雲路還聞逐塞鴻
蓮社故人如見問
為言涉世百無功

次韻蔡寬夫解元暮春見懷

九十青陽安在哉
臨風搔首謾遲回
春於我輩非無意

詩必先成為有才拖架醅釀香破麝翻塔芍藥大逾杯
病除更約歸愚子浮蟻猶堪席地開

又

驚紅簌簌點蒼苔春去黃鸝喚不回九藏脉參知我病
千人筆掃見君才會須礪砢揮談塵方悟蜿蜒落酒盃
命駕相應憐叔夜笑顏一月幾能開

又倒用前韻

休論花草與樓臺借得江南疊嶂開縱使春歸無覓處

何妨人樂自持盃
碁如孫武推多算
詩似顏淵已竭才
早晚竹林修故事
更看君筆燦昭回

送及之賢良遊錢塘

屏迹人間二十年
下帷捐寃陳編新
書曾入老商盼
高弟誰如顏子賢
策杖青山元有約
揮金紅藥故無緣
豈宜便隱雙溪去
優詔行聞墜日邊

送俞秀老歸維揚

踏雪驅驅原憲履
御風獵獵老萊衣
情投豈比鍾山出

興盡遠同剡水歸煬帝池邊松蔭遠維摩室內燭光微
携筇促席相羊處應記當年接下機

雪中呈秀老原道

引舟西上正隆冬千里隋堤雪翳空恰似常年三月尾
柳花凌亂逐東風

戲孫揚休

耿耿僧坊寄日邊晚移窮巷避誼闕羹藜不飽同攻苦
秣馬言歸獨處先木葉已隨風力遠霜輪行作璧形圓

衣冠返敝文昌路何似高堂坦腹眠

簡李子温推官

太冲當日號無兄苗裔于今更絕倫
力究本原書篋富唾成珠玉錦囊新
龍門久欲攀高躅鼎角方欣覘後塵
借問竹溪餘地否狂吟聊伴謫仙人

寄周庶彥

不見水清幾歲周乘風舉翮恨無由
瀕江松竹三秋後隱几情懷萬事休
險阻艱難空蟻鬪東西南北正萍浮

與君相好如兄弟莫惜微言為置郵

風起有感

秋來鬱鬱但炎蒸一夜狂飈駭四隣
斷送冥鴻尤得勢留連殘暑更無因
鏡中鬢髮雖非故窻下燈檠漸可親
勿似安仁兒女態由看節物重悲辛

班超

功名從古病難成况作天西絕域行
縱有平陵同落落其如衛候尚營營
殺妻吳起終遭逐上䟽鴻卿不免刑

定遠獨能逢聖主
千年萬歲藹嘉聲

次韻崔浚明見贈

誰為冥行作指南
青燈黃卷久間關
逢君豈測陂千頃
許我時窺豹一斑
驥足拘攣雖未展
龍鱗騰踏會須攀
如何暗把隋珠擲
欲報殷勤只強顏

將至南京簡應介中

得之平陸我登車
不見羣優孟子誅
只恐鼻端無好質
歸時依舊腹空虛

其二

幾日風塵困馬蹄
忽瞻孤塔獻雲霓
雙眸已似清江洗
况入亭城見角犀

其三

先生不得醉紅裙
何以留連逆旅人
故苑池臺老秋色
頻宮講罷走車輪

其四

直諒多聞許我親
迷途從此遂知津
社中忽恠爾來進

曾向睢陽見異人

九月朔夜聞雨

塵濛蛛網暗東齋
設榻君能待我來
昨夜梧桐有消息
會須急上宋王臺

送曹巨源之南都

高堂且置琴中操
駿馬初馳陌上塵
無限清風與明月
一時分付屬閒人

輓石適中

剽犀翻羽早稱竒
亨會難遭但布衣
不使牙籌煩伯仲
果然玉樹照庭闈
靈臺久已天昭鑒
奏籍初聞子發揮
三世簪纓正無恙
如何遽作百年歸

又

南明山下讀書堂
曾許寒生借燭光
高義豈殊親骨肉
令人無復念家鄉
那知十載天涯別
忽起三泉薤露傷
追恨故時携手處
不能執紼助棺傍

和朱仲明見贈聞琴

子期骨髮已埃塵誰謂知音不復生
觸處折楊爭屬和
獨君忘味歎遺聲
華門寒日正多暇
玉塵高談相與清
鶴舉魚沉重惆悵
一樽麥酒薦藜羹

次韻趙希元憶處州梅花

萬花頭上占天工
得意開時斗未東
破月麝臍來馥郁
橫烟玉樹淨玲瓏
暖歸故葉應欺雪
人在他鄉正御風
借問殷勤動詩興
忘機爭似鹿皮翁

冬至夜夢中作

爐烟颯颯對團蒲
暮去朝來只自如
還見人間好時節
羣陰消盡一陽初

雪中簡次蕭求團茶

竹上松間敲玉花
最宜石鼎薦靈芽
蓬門不識蒼龍壁
借問風流宰相家

和晦之見贈聽琴

忌子當年妙五音
曾令按劍草初心
昭文重愧難成曲
潘岳胡為繆見尋
在昔絲桐嘗棄置
到今山水自高深

何當共造無絃處莫使淵明擅此琴

再和晦之

舉世欣欣濮上音
絲桐還寄長卿心
知君韶濩思千載
勁節松筠挺幾尋
萬籟息時霜劍立
一燈明處夜堂深
他年振鐸收遺器
豈愧雲和瑟與琴

倒用前韻

我有一張琴窮高更極深
瓠巴那解鼓師曠
杳難尋
寂三冬夜悠悠萬古心
衣冠徧天宇誰為作知音

次韻道卿寄同僚

從事休嗟我獨勞，何如對雪詠瀟瀟。
聖賢澹灑冬來美，朋舊綢繆老不凋。
仇覽初年猶主簿，田單他日竟屠聊。
上方側席搜遺逸，未易沅湘作大招。

督巨源和詩

詩成七步有家風，底事淹留歲已窮。
應笑枚臯太容易，欲令句似長卿工。

郊行呈彥祖

遲日初乾雪徑沙等閒聯騎過田家長官標格風塵外
衰草坡前報晚衙

和彥祖寄次蕭

格外參軍事事嘉竹窓全是子猷家清狂上客知何處
恨不同燃柏徑槎

東理堂

主人生長綺紈中標致分明儒者同結構不因窮鼎俎
棲遲聊欲事磨礱血漫霜劍悲王鳳生擁雲鬟笑馬融

銘府功勳久牢落會須騰踏振家風

戲社正李子温

紅蓮上客有新編不見長安驛使傳寄語持綱社中老
可憐三百青銅錢

寄陽先生

先生名孝本唐陽城苗裔舉進士不
偶輒罷不畜妻孥來京師買書數萬

卷以歸老于通天巖

帥蒲公上書蘇公薦之

長揖公卿不轉頭五車圖籍指虔州屑榆肯使家風墜
謝幣空令世俗羞

鄉人知其貧甚共出錢三
百千助之先生毅然不受
弄鳳騎龍

誠莫及壞車殺馬恨無由嵩山出處君知否

嵩山處士
近有朝廷

起者未幾言者
交攻之竟罷去似與高人作覆輳

發山口堤上

烟籠官柳籠堤風引澄波細細移駿馬不知鞍上意

回頭已是獲麟陂

渡汶河

舊來紙上得河名今日橫過徹底清浚治早經神禹手
若為汨汨尚西行

過中都王彥章廟

一時多難見忠臣，力擁貔貅扞此城。
豈為聖人曾作宰，由來壯志在留名。
鐵鎗埋沒今何處，廟食追崇事若生。
功業已經華袞贈，只應長伴斗魁明。

慎奪堂

百鍊終成繞指柔，何人勁節擬橫秋。
目前軒冕自來去，堂上詩書嘗講求。
風度綺疎香漠漠，月移苔砌竹幽幽。
將軍此意生平事，不似空言不到頭。

閔軒

結構俯危城公餘杖履輕事隨塵自遠心與水長清隱
兒魚方樂開窻雨乍晴懂懂渡頭客誰會此時情

王憲湖上分韻得荷字

使星明處是天河習習輕颺生芰荷自有芝蘭生後乘
更容簪履侍鳴珂未甘城鼓促清賞聊與汀鷗分素波
異日定應如此少雲雷行欲起龍梭

時王憲
已被召


送王憲赴闕

鳳詔傳天北，輜軒指建章。既能思賈誼，何患老馮唐。況
是高門慶，從來美譽彰。靈臺懸寶鏡，峻節凜秋霜。庖
刀誠難敵，黃陂豈易量。承家但清白，報國頗施張。屬部
分，羆犬終朝事，錦囊收功殊。俗士知已恃，明王此去堪。
前賀胡為獨，倍傷昔霑淮水潤。今借德星光，折柳故多
恨。銜環空不忘，他年重望履。應已步巖廊。

送王裘仲侍親赴闕

置榻初相得，膏車忽起行。秋風無限事，麥酒不勝情。原

憲何曾病丘明竟有聲從容湖上語他日看功成



道鄉集卷六

欽定四庫全書

集部
道鄉集卷八

詳校官庶吉士臣吳烜

侍讀臣孫球覆勳

總校官中書臣朱鈐

校對官典簿臣劉景岳

謄錄監生臣劉人鶴

謄錄監生臣林大本

欽定四庫全書

道鄉集卷七

宋 鄒浩 撰

詩

試日懷世美

挾策剛為泮水行
暖風遲日試諸生
姚黃魏紫知何許
獨有楊花撲硯輕

戲王寬之

晚來聞說醉黃封
絃管欣欣急雨中
應笑西隣少風味

一爐沉水對梧桐

其二

黑龍翻海幾朝昏
今日晴陰似欲分
不道穀飛多作蠱
猶教歌扇過行雲

次韻世美簡別乘喜雨

一勺龍泉甫到城
滂沱疑是瀉南溟
棗心正為斯民赤
菜色寧憂異日青
擊壤田家方自得
擲金詩軸已交
形病來無復高陽興
宴喜空煩置醪醑

湖上雜詠

荷葉如錢三月時
幅巾藜杖一追隨
爾來勝事知多少

惟有風標公子知

杜牧之以白鷺為風標公子

其二

何處清風作晚涼
解衣相與面滄浪
青萍紫芡令人恨
遮却琉璃萬頃光

其三

華亭標格本青雲
邂逅西湖秋復春
作意一聲君會否

鷓鴣集處是真人

其四

疾病經旬厭藥杯
喜君折簡傍湖來
濃雲幾敗乃翁事
賴有南風為約開

其五

濱湖一一敞雕欄
自是黃塵不汝閒
今日舒眉寧易得
未應輕作剡溪還

其六

霜蹄檜楫久途窮暫喜天時人事同
濯熱不須三島去
高談落麈自生風

其七

嵯峨秀色雨晴時極目城隅更落暉
何必鱸魚動秋意
好携雙屐便言歸

登樓

葦門真蟻穴曠快一登樓天地投雙
曉詩書落九州欄
杆元詰曲日脚更遲留借問同來客
能同此意不

聽泉

天中懸日月激激正鳴泉洗耳豈吾事披襟聊石邊
焦桐無雜弄佩玉有羣仙欲識偃溪語于今蹄與筌

呈同社

太史占星久寂寥高陽烟月但蓬蒿人才豈是非前日
天意端如待我曹萬古衣冠歸指顧一時天地入風騷
他年南北參商去知有青編破鬱陶

馬上

策馬戴殘星郊原破暑清人間千萬事併入一時情

又二首

晴空雲物不留形大塊遙呈一點青聞說崐巖隱君子
何當北面問黃庭

其二

孤塚如山官路傍老農指似是前王可憐烜赫當年計
牧笛樵歌付夕陽

追涼

三伏流金石端居若探湯古松搖落照芒履促追涼天
壤知誰似形骸亦自忘何須北窓下始解到羲皇

參寥示簡元規詩用其韻寄之

千崑萬壑久青天一鉢新從淮上旋昨日浮雲今止水
誰知庵內更無邊

又

人間何嚮不鹽梅江海元從蟻穴開列戟門庭掃蹤跡
只應飛矢亦潛來

次韻參寥訪和靖先生故居

湖邊高節與誰鄰
落落寒松徃徃皴
就使衡門已塵土
不妨千古自陽春

關氏四照亭

次韻參寥

孤亭縹緲枕烟霞
面面江山不用賒
何日乘風指星紀
與君携手逐飛鴉

壽星院觀竹

同前

祇園寂寞聳高材
自有鸞凰接翅來
回首壺觴散桃李

日斜風動使人哀

送王幼安赴舉

幾年幽徑委榛蕪此去寒生孰子如
筆下奔騰三峽水胸中突兀五車書
豈惟麗賦欺弘正會使清時識仲舒
富貴由來皆骨相門閤高處莫趨趨

送二弟赴開封舉

古人捧檄緣親喜况值秋風一鶚天
相與搏空謝蓬艾歸來稱壽綵衣鮮

堪澗馬鋪壁間有黃元明詩因次其韻

武當在何許漠漠西南天雷電正多事道途如去年參
差揮塵約妨廢把書眠破我征鞍恨清詩猶燦然

純孝墓

禽犢何知尚母懷黃泉相見豈宜哉向非雅意一杯去
安得迷心中路迴自古功名隨日月于今廟貌倚崔嵬
可憐肉食趨朝者糞壤紛紛久已灰

仙翁山下遇王由正用驛壁二詩之韻見意

物外風期迹已陳
須知日月去來頻
我今欲換神仙骨
還向山前逢異人

用邢恕
舍人韻

其二

烟雨冥冥不肯晴
無因飛步數峯青
竭來山下傾談麈

全似江邊語醉醒

用魏銓
鈴轄韻

阻雨呈由正

秋風吹雨入踈櫺
永夜漫漫雙眼明
借問泥塗困行李
何如南畝念西成

其二

煉石曾聞補就天如何淫雨尚綿綿
只應知我班荆意欲使從容夫子前

過仙翁山

羣山環拱一山青曾駐仙翁竟得名
前日授書非我事旋頭不耀正休兵

別由正

許汝相望無百里政聲文譽益驚人
豈知今日俱長路

重慰平生仰後塵雲澹京山黃鵠舉風回漢水白鷗馴
歸來有約天從否準擬冥行細問津

穰東驛壁間有詩因次其韻

箠轡驅馳長眼花更堪風雨作泥沙郵亭准擬一醉倒
白酒黃雞無處賒

林垓驛壁間有詩因用其韻

日轉山亭寂寂夢迷蝴蝶雙雙何獨淵明寄傲吾今亦
是南窓

早行

朝來由氣銳前程入馬蹄天形隨月見斗柄傍人低路
轉纔縈白沙平豈辨泥露零欺髮髮犬吠隔蒿藜恍惚
南柯夢參差逢氏述比經十里堠始報一聲雞似脫闕
中日如趨圯下蹊脩真空有術習懶信無梯行李幾時
北武當猶在西誰知貴公子角枕正清閨

順陽東山下小池

用西伏牛亭
謝公定韻

行盡江山知幾重山前池沼尚殘紅塵埃滿眼欣相見

駐馬垂楊夾岸風

將到均州

武當孤壘插天西一見都忘渴與饑
倦客惟貪早休歇不知匏繫未成歸

次韻宇文伯脩題清溪驛梅花

驥尾曾容躡後塵柳花榆莢古河濱
天衢事業已騰世山驛詩篇知幾春
梅萼故應如異日風騷仍得慰幽人
須知猶是枯枝在早晚吹噓近紫宸

入試院呈同事章顯父推官及監試柴承之朝
奉

漢江洶洶不知休江上譙門鼓角秋
匹馬崎嶇隨國事同心邂逅得儒流
何妨蟋蟀床頭急况是芭蕉雨脚收
別乘端容共蕭散從今相與傲浮丘

午枕覺懷世美

睡鄉天地肅秋風日日欣隨宰我蹤
靖節有人須命駕道途何事不相逢

李元禮墓

幾年模楷揭天中四海衣冠盡影從
必待名人裁受謁
遂令當世比登龍
求通謾負孔融志
執御難追荀爽蹤
回首高門正如市
悲風獵獵起長松

泛漢江

漢江袞袞接天流
百里舟行一轉眸
白浪激風鳴戰鼓
青山迎棹走長虬
均陽已斷南柯夢
鄴上還驚宋玉秋
南望祖塋能幾驛
王程不得下荊州

又二首

誰家游女戲江濱
纔見舟來競歛身
須信文王風化遠
至今猶自被行人

其二

山東長江激箭奔
扁舟衝破白鷗羣
故人正在笙篁裡
一枕灘聲誰與分

懷襄陽

寄跡襄陽北
無因弔古人
卧龍應索寞
墮淚想鱗皴
不

作龐公客空回徐庶身風流終自若他日引車輪

次韻顯父睡起偶成

杜門無復轂聲來一日剛腸欲九迴消遣但能眠白晝
較量猶勝走黃埃霜風却暑通歸路籬菊要人薦壽
杯同我此心君最切更將幽思託清才

留別顯父且約相見于南陽

風帆催我上輕舟不得追陪自在遊山路馬蹄新雨霽
早來攜手百花洲

次韻監試喜引試有日

竭來凡韻續高張
鳧鶴居然分短長
鳴鼓未窺才氣勇
懸河先飫古今詳
三秋欲半月方好
萬事無忘心更涼
只願真賢起山國
異時端委贊垂裳

湖上聯句

遙岑艤舟見

德符

野思過橋生

至完

興盡回蘭棹

子厚

歸鞍月正明

世美

湖上

等閒來棹釣魚船
鷗鷺相忘亦自然
多事脩鱗躍波底
一齊鳴翼上青天

其二

烟含夜色迷修竹
鴈帶秋聲落晚沙
不是胸中有雲夢
只應悽惻滿天涯

送薛唐卿赴省試

河東文物久塵埃
之子亭亭鬱有材
已見中天鳴鸞鷲
不應環堵更蒿萊
綠衣春色知誰共
青簡風流自此開

傾耳西州人快意玉堦曾上直言來

送周茂宗學正赴省試

草衣藿食寄塵編凜凜聲名玉几前
命數曲留成大器鄉書重上欲華顛
一鳴竟與凡禽遠三獻方知美璞全
二十餘年古人志從今攄發到青天

送周天和學諭以次十一人赴省試

日月交光萬國同羣英無復嘆途窮
長松竟拔徂徠雪駿馬爭馳冀北風
黃卷論心窺聖域青雲携手赴王功

歸來協氣充閭里好是邦人識類宮

元夕席上食柑子

六言

契闊吳門千里棲遲潁水三年騰炬光中氣味洞庭波
上風煙

簡仲孺

仲孺約德符來即烹茶
德符即來故作此報之

曉來城府春融怡博陵先生還自西天時人事已如此
不應壁月空雲霓

次韻酬德符湖上春色

乘風曾到水晶宮
春色推輪日力中
幾處梅花傲殘雪
不隨桃李事輕紅

戲史述古多問相

窮當益堅愧枉道
心不勝述思齊賢
如何東里史夫子
骨相勤勤揮酒錢

世美約仲孺述之同
泛清濕登樓待月
分得樓字

風塵作惡敗清遊
杖履無光久自羞
約我晚來尋小艇

與君愁破對高樓山分遠翠凝衣重月借澄輝撲水浮
不是巖城不容與徑隨雙鶴宿滄州

其二

采石仙人放小舟荊州老子上南樓平生風度歸遐想
今日還逢第一流

與仲孺述之世美東禪納涼校韓文世美以韓
公召先去

清風多處是精廬飯罷俱來校異書車馬焉能落吾事

未斜桐影且安居

其二

紅衣青簡竟多岐
無復尋盟作四夔
同見韓公不同趣
城南城北轉黃鸝

送杜謦居方城

迺翁鬢髮已秋霜
藥裹仍開滿北堂
貧欲釜魚勤子職
分甘足蠶寄他鄉
山前黃石空猿鶴
溪上青編屹棟梁
想見使親忘我後
借書尋舊日徜徉

曉雨枕上有作

震霆幾日動天閭
河漢朝來竟一翻
頓覺炎歊辭枕簟
只應爽氣滿乾坤
雞窻豈但開千卷
雲稼懸知亘九原
此事平生最闕慮
從今得意遂忘言

次韻德符曾家池上四詩

涼雨霏霏徑沙芰
荷無數擁烟霞
幽人不受市朝挽
竟日池邊藉落花

其二

平生一語事誠忘
鳧鶴不知誰短長
跬步秋園作殊域
從他白眼嘲羣穉

其三

庭前葉下風蕭蕭
暑氣不敢憑虛驕
青天碧水與君共
他日謫仙宮錦袍

其四

真樂油油波底鱗
相從款款波上萍
雁奴燕子社前後
玉樹鮮風吹晚庭

世美寓展江作此簡之

白鷺飛時天宇清
君家琴瑟寄江濱
不愁折柳無多日
且喜荷花有主人

其二

翩翩儉府幾西風
更擬真遊淥水中
秋晚倚欄應記得
全家看盡渚蓮紅

王中玉罷使事寄展江韓持國作詩送之有此句

洗竹

欣欣花草不關心
絕倒官庭一畝陰
夏籜隕風裁幾日

秋筠要月擬千尋
携持斤斧從他恠
繚繞欄干著意深
全是吳中舊瀟灑
過門應喜伴龍吟

寄表仲

侍親知
滑州

幾度秋陂老芟荷
蓬門不見雁來過
照人眉宇今何似
得意詩篇日更多
事逐風雲空白馬
功隨山嶽尚黃河
無因雙眼陪君子
暝立西樓一楚歌

南堂八絕句

聖賢祠畢諸生散
曳履斜陽哦杜詩
幽鳥飛來似相好

竹枝深處語多時

其二

桐竹交陰覆廣庭
秋風時與葉爭鳴
可憐一曲明君操
不似高山流水聲

其三

長廊耿耿注西東
鼓腹循環返照中
更擬將心寄明月
無端雲葉上晴空

其四

盆水如池傍竹根
早期功業在龍孫
爾來取飲多竒羽
更得南堂幽趣繁

其五

窶人何緣有遺啄
一飲聊分秋水清
貪泉盜泉滿機械
鳥鵲故應知此情

其六

風搖踈影落清漪
汎汎魚兒起晚嬉
不是來禽驚不去
窻前從此使人疑

其七

倦來搢策立階除
深喜官居似隱居
寒日西流報衙鼓
紛紛清影上圖書

其八

綠竹不應忘舊好
黃花還擬結新交
欄邊醉倒非吾事
只愛金英嬌玉梢

送田承君隱大留山

田郎風節薄清旻
耻踏冥冥車馬塵
遠業不應忘魏闕

高人聊喜得東隣
鹿門隱去曾携子
綿上歸來亦侍親
早晚雲飛雨天下
勒移何愧北山神

湖上訪世美不遇

時世美燕
集總管家

夜雨朝晴似蜀天
湖光山色故人邊
琵琶不許陪犀麈
聽水亭東一黯然

月下懷同盟

常時二妙過晴窓
丙夜猶同秋月光
不分城扉日多事

天南天北又參商

仲孺
述之

其二

碧天如水駐冰輪
粲粲裁餘一兩星
想見牆東病居士

廢書捐枕步中庭

德符

其三

晚雲携雨入陁山
月到西湖萬象閒
公子歸來泛家宅

只應詩思落人間

世美

其四

睡覺譙門已轉更
小童徐報月重明
攬衣起與妻孥共

矯首惟聞鳥鵲驚
瀕水杯盤無俗物
隔牆巾屨有真情
相從竟日今相望
四者由來不易并

其五

一經三五一虧盈
此夕胡然分外明
金令中分寒暑候
蟾輝獨占古今清
樽壘自是常年事
天地何難永夜晴
寄語風雲莫無賴
萬方矯首此時情

次韻王彥溫邂逅登舟

過盡西城百丈堤
村村雞犬午聲齊
風前匹馬不回首

知有幽人在竹溪

時彥溫
後至

訪仲弓

涼雨吹絲絡晚空竭
來秋興與君同
吳亭鵠立雲霓上
未許山川落眼中

道鄉集卷七

欽定四庫全書

道鄉集卷八

宋 鄒浩 撰

詩

中秋日泛湖雜詩

高柳籠葳暝晚烟拍堤秋水遠連天恨君不見桃花盛
十里紅波送酒船

賞心自與月俱圓今夜晴陰莫問天秋色向人方有意
不逢星女不迴船

望中白鳥點青烟
秋意交情兩薄天
仙李騎鯨不知處
高吟誰繼岳陽船

晚風知我興飄然
力戰浮雲露遠天
判却明朝官長罵
與君徹曉引金船

從來筆力掃千軍
卷舌無聲豈不能
欲似元戎耀奇策
故令偏帥作先登

荷花影裡逢君輩
棋子聲中愧我能
擬上高樓對殷浩
更憑長嘯引孫登

胡牀兀兀坐忘情似向曹溪見老能若處樵歌好消息
妙高峰上許人登

路轉城隅更可憐畫橋橫處響潺湲篙人不會凭舟意
徑逐西風過水源

靈隱山前獨子知清溪渾似潁川湄何當把手東南去
却向山前話此時

呈世
美

士龍擁鼻時一笑司馬忘機只言好野人浪測君子心

應為狂吟分枯槁

呈仲孺
述之

舟去舟還秋半時
孤花細草雨霏霏
恠來詩句無清思

不見沙頭雙鶴飛

不見
鶴

每將冲韻擬琴高
不值飛鳴心更勞
邂逅詩成似招隱

稻花深處舉霜毛

見鶴

誰家脩竹拂雲電
影帶晴光漾淥漪
風日無情促歸楫
不教閒客共題詩

早覺鳴鳩啼水杪
晚來晴日破天顏
不愁今夜雲遮月
且凭闌干一看山

乍疑絕岸行飛鷺還誤遊魚出聽琴公子自隨星斗去

水聲他日是棠陰

世美水邊聽訟

濫巾文會出重城把筆時為蚯蚓鳴日暮歸來理章句

低頭慚愧楮先生

觀所作詩

興盡歸來濕水邊翠陰亭上奏繁絃龍媒耳接新聲慣

駐足西風不受鞭

脫歸馬上馬乃高明豫者

次韻述之

杜陵秋擬問真源博望親從天上還不使清風委平地

斯人今日在陘山

次韻德符展江懷世美

翩翩風御返瀛洲清夢還應此地遊
憑仗雲鴻寄消息
爾來何啻度三秋

次韻先生湖上有作

霜落西陂晚追携物外歡
孤芳迎日動輕浪逐蓮乾
魚計從來審鷗盟未易寒
誰知少陵老愛客似蘓端

湖上

菱盤不復藏秋水蒲劍猶能戰晚風
共陟孤高更忘適
紛紛霜葉下晴空

次韻陳君益見寄

冉冉歲云暮泠然流水心
他邦勤短策今日慰孤斟
竹韻凌風遠花光受月侵
毫端落珠琲三復故情深

次韻羅正之朝散到臨潁見寄

何事委天數平生唾李尋
同時得君子如古惜分陰
白髮日非故黃花秋似深
誰知千里駕中有歲寒心

代書招德符

北風鳴四野，饑鳥下黃昏。
寒燭照無寐，孤懷誰與論。
伊予賦招隱，撫事倍銷魂。
莫使衡門下，朝來獨負暄。

偶書

元鳥未來陽鳥稀，廣庭松竹皆故枝。
書邊癡坐送日月，春色過門都不知。

謝馬叔寶惠佛像琴絃

故人知我久，忘情不假苞。
苴遠寄誠金，範睟容窺徃。
製

絲傳流水得遺聲
隣雞破曉爐邊靜
霜月儲清席上橫
香散曲終誰會意
與君相望一高城

曾存之以佇雲名庵以待緇流因作此戲之

不見從來庵內人
結茅瀕水更慙懃
雲飛日日滿天地
借問如何能佇雲

仲弓見訪同過叔原

幕天雲不動庭竹
晚生寒好事倏假
蓋擁爐聊整剗香
煤圍薄霧松塵落
驚湍思逸何當盡
鄰家有謝安

次韻述之謝寄蘭

揭來幽韻與時分雅稱深沉揚子雲
記取人間多惡草
一猶能敗十年薰

曾氏北園

浮雲不傍此庵來竹靜幽蘭一笑開
若處鮮鮮解人意
等閒冰破作春雷

藕花蓮葉弄晴暉長記君來作好詩
我亦池塘興不淺
若為相望北風時

江禽插頸夢初成
庭樹橫烟晚更輕
已恨重城落吾事
更堪明月向人生

蘓郎北闕未尋盟
崔子西山尚掩扃
矯首空庭問懷抱
天高無路鴈邊青

十年不折江南春
亭下雙梅是故人
憑仗開時屬青翼
已判飛雪滿懸鶉

白蓮香火久凋零
還似樂天今服膺
我有一言人不解
請君問取北來僧

種竹

去年今日常種竹今年此日還添栽豈論傳舍不吾有
但願清陰遺後來

次韻德符寄世美因以招之

織女牽牛餞我車歸來籬菊已榮枯韓城夫子舊青眼
肯使東齋屐齒踈

次韻承君見寄

紛紛市道久成風平地青樓作帝宮白玉相看有君子

坐令高議薄冥鴻

生平勲業在詩書
黑綬翩翩下紫珠
漳水功名未為最
他年丹檻更捐軀

謝承君見訪

龍吟虎嘯嶺雲開
卷罷殘經首重回
命駕直因中散去
齋羊不為護軍來
真情破臘融初日
高論先春駭迅雷
勉力古人論一報
終慚瓦礫異瓊瑰

次韻劉世德見贈

詩書久與壯心期邂逅塵埃滿客衣不分壽陵終失步
更憐蘧瑗早知非龍蟠舊水風雷在玉韞寒山草木輝
大抵窮通有時節莫將吾道羨雄飛

次韻文仲元日登巽亭

春隨鼓角靜浮遊放浪乾坤百尺樓北陌東阡政車馬
一時高興屬清流

刺字漫來得古城柳枝桃葉入春情人間久遲東君到
獨子相投蓋始傾

次韻馬叔寶憶梅

儒冠染盡馬蹄塵，又見年光冉冉新。
寄我一枝無驛使，賴君佳句有陽春。
雪邊孤韻謝安石，風際幽香韓得真。
何日相携拂衣去，澹烟微月楚江濱。

仲弓意欲協律作此戲之

王郎豪翰落明珠，自合鸚鵡行儼帝居。
底事奉常思協律，不歸天祿更雙書。

次韻仲孺用前韻寄世美二首

雪霽高陽里欣欣春意深
舊遊還入眼何處復揮金
塵表誰南北杯中失古今
重憐非土木猶自一沉吟

天宇梅邊靜春光破蟻封
嶺雲猶過鴈水浪欲飛龍
玉鐙隨新約茅簷祇故容
何當卷書去相與豁塵胸

次韻文仲落梅

前引蒼龍駕人間春欲光
遽先鴻滅影應誤蝶尋香
何事雪霜際不隨松檜長
無言倚晴日酌水與君嘗

次韻仲弓寄德符大受

時二子皆持母服

二子麻衣掩舊春
霏霏皆血灑
驚塵白雲不雨還
遮岫

德符有
白雲軒

清潁無心解閱人

大受居
清潁上

禍福循環終有數詩

書飽腹未為貧
何當跋馬同君去
蘿月松風慰禿巾

鄰家集射

墻東金鼓不停聲
知是將軍奕世孫
莫浪鳴弓向飛鴈
一年一度到中原

曾園見梅

濱水娟娟四五枝
不甘柳眼巧相窺
晚來快我江南思

似欲慇懃報小詩

姑射冰肌不黃土洛陽玉容更青春
嗅風影日了無語
知我此心能幾人

雪中懷述之

不為梁園賦因辭潁水濱
誰知遇風雪孤坐耿陽春
問路無來轍携筇匪舊隣
從君一樽酒猶喜有詩人

招文仲

暉暉晴日動寒灰
書罷衡門為子開
莫似王郎著杯酒

更無茶思竹邊來

聞小引呈仲孺文仲

香中日月久無鄰
特地過來兩玉人
何必開軒視天壤
角聲嘹亮自知春

獨坐

庭下芝蘭秀
堂中簡策清
都緣無嗜好
不是近聲名
聞仲弓得籍田公

夏木如雲作晝清
西豪無復岸綸巾
知君談笑籍田去

又喜長安有故人

對雨

不為泥融俟燕還
自携秋事入春田
人間因得風光好
洗出從來寒食天

寒食日諸友見過

燕子聲中糞食寒
北轅同軌得儒冠
槐檀新火未曾試
為覓山泉破小團

和仲孺前韻約賞展
江海崇及簡仲弓述之

西蜀地暖北地寒長條殿春走衣冠江亭巧作故時面
濯濯宮錦花成團

一日秋陽十日寒李下多機難整冠戴崇彭宣各天性
玉斧何當新月團

曾園見海棠

海棠簇簇弄繁英隨分相逢眼自青一種風流似西蜀
何須心着展江亭

戲明豫

西幕情真庭駐雲東幕心機門閉春無端幽夢落蛇虺
漏洩風光來近隣

代者不以時至失仲孺同行之約愴然作此

平日蓴鱸計猶隨黃犢留蘓君驗前語裴子但孤舟隋
柳薰風岸淮山霽月樓故因今好在為我一回頭

上巳日招仲孺述之

三月三日潁水濱蘭亭故事顏冠巾與君嗜好酷相似
速來同繪盤中鱗

次韻仲弓馬上

霜蹄遙指日邊飛，猶得春湖一笑期。
到此君方動離思，併將懷抱入新詩。

次韻君表送仲弓迴有作

北野陰成幄，崇朝得暫休。
班荆無濁酒，交轡有清流。
風絮閒相逐，晴絲懶自遊。
吾行亦朝夕，未擬問功裘。

招仲孺述之同過文仲看醑醪

芝堂公子讀書忙，堂下醑醪晚自香。
猶喜阿文清興在。

擬携雙壁步斜陽

次韻謝文仲惠醪

遠架應憐不記歸故分新摘慰棲遲
慧香妙質無人共
賴有青牋寄我詩

次韻龍陽孔方平秋居見懷

黃落龍山暮天高霽色澄
棲巖方自若吾子亦難能
家學潛東國時文斥茂陵
遙知見懷處詩就耿寒燈

次韻和錢塘諸公賞梅十絕

衝寒來訪喜生和破恨新詩不必多
太皞初還好消息
從今日飲更無何

瓊英潛解叩靈臺一見先令雙眼開
欲識情緣未忘處
不辭珠履步蒼苔

雲山寂寂水回回幽境非緣世俗開
桃李無言且如此
自然人逐暗香來

江天吹雪不勝繁南北東西晚更昏
料得時人散車馬

清吟應亦有英魂
項年江淮間有冥漢子為梅詩云紅
苞紫萼曾欺雪素艷清香解動人自

有風傳枝上意肯
教蝶見藥中真

陳根未作去年花
天宇空明鴈影斜
忽上溪橋見顏色
不施朱粉似東家

排闥端令天地開
萬花從此四時催
政如匠石椎輪後
始有光華大輅來

東風杳杳動冰泥
素萼迎春滿故枝
早晚團空熟青實
人間消渴待真醫

蜜蜂蝴蝶未狂飛
螻蛄仍難上凍枝
惟有青松一千丈

相看曾共歲寒時

綽約冰肌故自輕
玉衣玉食更鮮明
無心來此與君遇
莫起他時兒女情

玉樹森森太傅家
玲瓏徐動曉風斜
可憐刻楮空機事
一葉三年猶未花

戲舜俞遊西湖

湖光收盡只芙蓉
決背飛來白鳥孤
想見城南葛藤老
又將心境示妻孥

贈周仁熟教授

西來黃軸塞虛空都在圓光一點中
陌路勸君高着眼
宗風况即是家風

次韻答李希白秀才

數椽茆屋異千間慚愧君歌行路難
自昔牛羊多列鼎
只今藜藿未盈簞
須將嘉木殷勤植
莫把修鱗取次蟠
請看齊城不危困
功名豈復有田單

次韻德符馬上口占

直欲掩關心似水不知開國面如田相逢一枕秋光裡
疑是先生亦姓邊

春陰

極目三封日易斜無因重守故庭花春陰又是憐花草
燕子飛來知幾家

聞鶯

櫻桃初熟露珠輕客裡光陰曉更清猶恐先生只歸夢
故携天籟入風聲

病卧讀書

山為屏障草為裯黃犢群中早奮身骨立詩書亦何有
不如參取坐忘人

次韻仲弓見答

青衫白馬吏天邊胸次長年只輞川我愧無才似裴迪
亦緣春步見新篇

席上呈仲明

誦詩久欲陪蘓煥載酒誰憐訪子雲莫道囊空乏供給

鄰家芹菊許人分

次王彥魯韻呈仲弓

城南無吏隱草樹水中央飛鳥有時到驚塵無處揚留
春供燕集落日借輝光一自烏衣後風流知幾王

送郭舜俞再任潁昌

穀雨冥冥春盡頭故人重解去時舟西湖好在一百頃
為我傳聲到白鷗

初到京謁執政

鄒陽謾說曳長裾東閣由來禮自殊
負郭田園倘無恙不如歸去老江湖

次韻文仲冬夜書懷

抱經何必歎空言看取東郊舊力田
蔗葦倘能無落事太陰居卯定豐年

長水迎日動堤塍堤上人行似獨醒
只有群鷗疑着在一時飛舞起寒汀

冷官裘馬怯凌風咫尺雲窻邈異封
長憶去年同燕處

竹邊梨栗送殘冬

初夏過西苑呈商居平程良弼二年兄

紅香吹盡綠陰垂恰似當年錫宴時今日玉津樓下過
午聲依舊轉黃鸝

次韻蔡天啓寄籍田令

興來雲路欲飛仙風更吹涼入綺錢豈但烏衣今莫逆
也知白鳥舊相便波隨靜止荷初展舟逐閒移楫自眠
我亦書邊有餘日與君同到五湖天



道鄉集卷八